



KOMUNIKADO DI PRENSA 2015-007

Dr. Emsley Tromp di Banko Sentral:

Invershonnán deseá den turismo di Kòrsou ta rekerí inventividat

WILLEMSTAD – Kaminda no tin suficiente kapital pa proyekto ku un riesgo haltu, mester buska método nan nobo i inventivo pa logra un apertura na benefisio di turismo. “Tempunan no usual ta rekerí medidanan poko usual i no konvenshonal”, segun e presidente di CBCS Dr. Emsley Tromp djáron atardi dilanti e miembronan di CHATA ku a reuni den e auditorio di Banko Sentral na Skalo.

Señor Tromp ta boga pa invertí muchu mas den turismo pa por elevá esaki na un grado mas haltu i pa por risibí mas bishitante den un ambiente apropiá. Invershonnán den e sektor aki, partikularmente den hotèl nan, ta akompañá pa un perfil di rísiko haltu loke ta trese kuné ku bankonan no ta muchu inkliná pa finansiá e tipo di proyektonan ei; ta trata di sumanan kuantioso i e sektor hotelero ta mas kompliká ku otro proyektonan pa invertí aden. Sin embargo, hustamente p’esei mester pensa i aktua di un forma kreativo pa kita e opstákulonán for di kaminda, kreando kondishonnán ku ta traha spesialmente pa logra esei.

Fiansa di mezzanine

Señor Tromp no ta di akuerdo ku bankonan komersial i institutonan di invershon ta eksigí pa doñonan di proyekto di sektor hotelero hinka mas kapital propio den nan proyektonan. E aktitut ei ta kousa ku proyektonan ta keda drumi. Aki el a referí kon Banko Sentral e tempu ei a yega na e bononan tan komentá na benefisio di e kompania di utilidat Aqualectra na Kòrsou i ku e kompania di haf di Sint Maarten. Tur dos tabatin mester di finansiamentu urgentemente. Ta bini aserka ku despues di e saneamentu di debenan relashoná ku 10 di òktober 2010, e posibilidat pa invertí den bononan emití pa gobièrnunan lokal a agotá. Esaki a trese kuné ku Banko Sentral no tabata disponé mas di instrumentonan pa hiba un maneho monetario efektivu. E bononan ya mensioná tabata un solushon pa ámbos opstákulo. Lo ta lástima si e diskushonnán kontinu tokante e bononan opstakulisá e nesidat di finansiamentu di sektor di turismo ku solushonnán netamente dirigí p’esei.

Di mes manera e industria turístiko tambe mester buska un enfoque diferente: si e formanan tradishonal di finansiamentu no ta duna un salida, mester buska método nan nobo pa logra. E anunsionan pa un hotèl Hard Rock i pa Courtyard Marriott t’ei, pero nan no tin fin di keda kla.

No tabata e promé biaha ku señor Tromp ta boga pa kolaborashon entre gobièrnu i sektor privá pa krea e posibilidat pa finansiamentu estilo mezzanine. Esaki ta enserá un fianza supordiná ku su mes kondishonnan na banko i invershonistanan privá den kaso di invershonnan ku mas rísiko. Bèrdat ta ku den kaso un bankrut un finansiadó ku a presta e tipo di fianza aki ta pará patras den e rei pa kobra, pero tambe ta asina ku ora e proyekto progresá bon, e ta benefisiá samsam. Den pasado a usa e Fondo pa Desaroyo Sosioekonómiko pa esei. Tanten ku e banko nobo di desaroyo no ta operashonal ainda, gobièrnu lo por aserka OBNA pa e meta aki.

Forma hóbennan

Aparte di e trayekto di finansiamentu, señor Tromp ta pidi e sektor turístiko tambe pa dediká atenshon na otro opstákulonnan den kaminda pa turismo por krese, manera mihó sinkronisashon di pa loke ta oferta i demanda riba merkado laboral. El ta boga pa formashon pa prepará hóbennan pa kumpli ku e eksigensianan di e sektor turístiko.

KORSOU, 25 di mart 2015

CENTRALE BANK VAN CURACAO EN SINT MAARTEN